

虛  
受  
堂  
文  
集

虛受堂文集卷十

長沙 王先謙 益吾

誥授資政大夫浙江嘉興府知府許公墓誌銘

公諱瑤光字雪門晚自號復叟善化許氏廩膳生道光

己酉科拔貢 朝考二等以知縣用分發浙江歷署桐

廬諸暨淳安常山仁和補甯海擢同知知府再署諸暨

咸豐十一年城陷賊同治元年坐失城落職尋復原官

以道員升用三年署嘉興府知府越二年實授光緒六

年以委察荒田忤巡撫意解任八年七月復任十一月

初七日卒於嘉興官廨先後知嘉興府十七年年六十

六著有詩集十六卷談浙紀略四卷曾祖諱大沅祖諱  
宏安考諱永璜三世贈如公官夫人再娶皆長沙朱氏  
先卒妾陸氏子四長方鈺殤次方義次綬若湖北候補  
同知並先公卒次方藻女四長適武昌縣學生劉蔭棻  
次適道州增生何慶銓三四未字孫男五鍾嶽殤鍾翰  
鍾藩鍾琇鍾錡孫女十曾孫女一光緒九年十一月十  
四日歸葬縣東官衝大山坡鍾翰來請銘始公在諸暨  
賊至公率鄉兵嬰城守數十日屢破賊城陷公與賊搏  
賊刃之顛餘賊環刃其額頰委之去諸暨民負而藏之  
他所越日乃蘇巡撫左公驗知其傷諭其賢能得民心

奏保留營公名用是大顯然仕卒不進銘曰

太嶽之裔始遷容城子孫分徙代有公卿唐雖陽守大  
勳峻節魏嘉興公曠世繼烈少通經術匪祿之干選貢  
太學俾爲宰官五權劇縣民驩吏伏豈無奸頑不勞鞭  
扑粵寇狂煽蹂浙西東公所治邑屹當厥衝公曰我民  
天子恩爾疇無忠義不奮以起民曰我公民母而恃活  
公我活願爲公使朝完樓堞夜斫賊營卒困不支地圻  
天傾交刃垂絕或昇以行公甘其死民祝其生疆吏議  
功 璽書報允賢聲上達公道弗泯奉檄籌糧大濟軍  
資 命復舊秩用蘇子遺公居大郡海涵春育橫日顯

顓一以兒畜匪曰水懦教成於肅鴻雁飛鳴復其邦族  
越十七年有階不遷人或中熱公心怡然民不吾捨吾  
不民捐此士此官永與周旋昔公秩滿入覲而歸民  
亭鴛湖來許以題壬午之秋公復其位民喜公還亭曰  
三至公去民送傾郭塞路歸公之喪號泣孺慕匪民獨  
良公政有成豈伊異術能通民情慈惠之師榮哀之式  
伐石刻文敬告典職

知府銜特用同知直隸州彭君墓誌銘

君姓彭氏諱啟昆字元甫自號雨棠江西分宜人也曾祖文紳縣學生祖汝琢父廷輝自曾祖以下以君貴

贈朝議大夫援例加封中議大夫廷輝子四君其長也弱冠補縣學生中道光壬午本省舉人甲辰大挑以知縣用分發山東歷署博興海陽定陶鉅野單縣事君初任吏事精意洞矚自治官書不一假手丁胥己翕翕有能譽蒞單逾月以械鬪仇殺報者六十而羸輕騎往驗當幾立剖眾志大和補平陰縣知縣粵寇穴金陵寢北犯君密戒備得羣不逞肆掠者盡寘諸法後充東曹濟

閒焚劫無完土境內晏然咸豐乙卯黃流貫大清河入海縣被災重君請帑以賑捐俸千緡繼之丙辰大旱蝗周行烈日中集村氓焚瘞延接父老拊循周浹用賑事見知布政使吳公廷棟檄署館陶縣鄰直隸大順廣三府姦徒攘斂往來境上千百爲羣莫敢詰禁君受事五日擒其渠十皆廣平戕官者也遭大禋白大府蠲其賦至飯脫粟度歲調署壽光修堞浚隍訓治團練下堅壁清野法於鄉爲堡三百有奇撚賊屢犯不得入民用感悅逋賦一清巡撫閻公敬銘甚重之疏薦賢吏九君與焉 詔以同知直隸州用加知府銜君每遇大獄朝報

夕勘屏絕供張守壽光時鄉團俘賊中被脅者數百人  
君察其枉將盡釋之眾露刃大譁或言幸少徇眾意君  
笑曰吾豈枉殺媚人者耶脫有變自當之數百人竟得  
不死其堅定卓絕皆此類也以老謝歸卒於同治十一  
年正月二十一日年七十五其年三月十六日葬縣南  
長隴祖阡娶劉氏先君二歲卒累封淑人妾張氏 誥  
封恭人子男子四毓岱早沒毓海光緒乙亥舉人戶部  
郎中毓陶殤毓丹大學生子女子三適某某孫男二  
君服官二十餘年惠孚於民聲聞於 朝宜致高位以  
樹偉業顧其間屢被齟齬摧抑弗竟厥施平陰之災君



以緩征減賦請於大吏事未上聞坐催科不力挂議  
鑄秩賴有申雪之者得復官館陶擒盜當以功被薦矣  
又失上官意寢不奏吳公知之而無用君之權閭公知  
且用之而君又以老歸時命之厄豈信然耶或咎君不  
少自貶抑以諧俗過矣朝廷將求循良與其治天下  
若君固今世之所需而難其得者而止於是宜知君者  
之不獨爲君惜也毓海束身劬古善承家學余典試所  
得士泣以銘請銘曰

吏不惟廉之貴惟其材足以濟也兼之者君乎胡又圓  
鑿而方柄也畜大而不光令子之繼也我銘公幽以詔

後世也。

贈道銜候選同知直隸州知州湖北鄖陽府通判周君墓志銘

君諱汝驤字俊才故江甯人遠祖諱昇明初從黔甯王沐英入雲南以功授楚廣兩衛指揮世職占籍楚雄爲縣人曾祖諱官麟縣學生祖諱庶沅府學生父諱錫章嘉慶己未進士翰林院庶吉士累官至湖北布政使本生父諱錫純廩貢生大理府學訓導升福建鳳山縣縣丞署知縣事君其次子也以貲入爲湖北鄖陽府通判歷署宜昌府通判歸州知州武昌黃梅南漳縣知縣襄陽府知府用治行卓異薦復奏保以同知直隸州知州

選用君服官十八年雖見推重大府然以性不苟合不  
得驟遷所至罕久任皆有實惠南漳居山僻閒俗健訟  
案牘塵積君視事市月益闕空虛椎埋遞減及去任民  
戶語曰周使君來吾輩始有生人樂今去矣集數百人  
遮官舍不聽行開警再三始羅拜泣散去後以憂居鄖  
南漳民相率走數百里致賻君慰遣之一無所受其至  
襄陽適武昌再陷粵寇土賊四應外防內捕比閩安枕  
數月而代遭母喪歸回亂大煽全滇繹騷楚雄與賊鄰  
君葬母畢卽出家財倡辦團練糧械甫集賊圍城以備  
獲全於是楚雄鄉兵號能戰賊數年不敢犯會大吏檄

鄉兵攻姚州館驛賊數萬疾趨陷旁近諸縣薄府城君與官民固守六十日賊穴地積火藥城下火發城頽十餘丈賊推鹵楯並入君督眾直城摧處搏戰殺傷相當賊益麇至君死之城遂陷君庶母嫂弟姪族人僕從死者四十二人咸豐十年四月二十二日也年五十四同治中君死事狀 聞 贈道銜廕一子入監讀書期滿以知縣用 允其家建祠以祀君一介不妄取濟人銳急輒散千金人目爲半體伊尹尤習兵事在南漳襄陽訓練團勇坐作進退皆親教之居楚雄圍城中方嚴冬君衣棉巡城左右以裘進君曰彼單襦荷戈者皆吾鄰

里鄉黨也。吾忍獨煖耶。士卒聞者咸感奮其明恕。得人心多此類也。妻謝氏同邑舉人遇女相夫以禮從官二十年歸無華美之飾。懿稱明德傳於戚鄰。先君殂葬城東某原子男二人材芳光緒丙子恩科進士翰林院庶吉士。改選廣西思恩縣知縣。材芬廩貢生候選訓導。出爲兄後女四人。第三女適直隸慶雲縣知縣丁崇雅。其卒日當楚雄陷。餘皆早卒。材芳兄弟就傅君教以讀書。當學聖賢故。材芳稟家訓。恂謹自守。志趣拔流俗。可貴重。初城垂破。君以材芳兄弟幼弱。遣家人護出。得不死。賊既定。求君屍不獲。以衣冠招魂合葬。謝宜人墓材。

芳泣請銘銘曰

學成胡以科目爲位不必大惟其施魂氣長在節弗虧  
形骸散落奚足悲生爲名宦死國殤星日之精虹霓光  
活民種德福永世報君令子作循吏

江西候補知府李君墓誌銘

君諱光瑩字白初姓李氏其上世爲江西人明洪武中徙湖南湘潭二都遂爲縣人某世祖禮部尙書太子太保諱騰芳以鴻儒歸望有聲天崇閒曾祖某祖某父某世有令聞不墜其緒君資性通敏幼嗜博覽長益刻厲咸豐初粵寇犯楚君率團練衛鄉里曾靖毅公貞幹器其能延入幕從征皖南復潛山太湖英山霍山諸縣敘功歷保候選府經歷縣丞浙江巡撫今大學士左公調赴浙江辦理營務從拔龍游湯溪諸縣十餘城肅清浙東歷升同知加知府銜 賞四品封典浙江按察使今



人  
生  
事  
集  
卷  
一  
九  
候補三品卿劉君典奉 命幫辦江皖軍務君總營務

攻復崇仁宜黃從入閩破賊袁家山新泉戰楊家坊前  
軍潰君赴水不死賊昇以見僞王汪海洋令僞將羅章  
仙監之君以忠義激羅羅感動護君出遂率眾降閩境  
既清從援廣東拔嘉應斬海洋擢知府畱江西候補以  
光緒二年二月十八日卒年五十一某年月日葬某原  
君練達治體強毅有爲初曾文正公國藩總督兩江策  
茶利爲外夷所必爭而義甯茶爲大宗定章收課小販  
納稅有落地稅單捆載驗行有局票曾公去任或訾稅  
單煩復令茶商赴局納稅領票不一年夷商入州販茶

者假東商名例過局驗行不入稅課大減大吏委君董  
局事君察前弊立復稅單奸商嗾夷人控總理衙門  
朝廷下其事大吏大吏以舊章奏竟得直先是有君素  
識置酒觴君曰子之來也自州牧逮商人皆弗便子所  
爲弗悛有奇禍曰我盡心公事何恤其他其人徐出袖  
中券八千金曰願以爲壽君愕然笑是將何爲曰州商  
利此二歲矣更一歲則事大定乞且毋用稅單子行受  
代去願熟思得金順眾情保全身名不則反是矣君曰  
待吾歸計之旣歸不告於妻子夜方寢起擊案爲誓馳  
書告其人曰吾不能媵國課以肥私橐事已定殺身不

悔無幾州牧以君家人焚賄狀許大吏大吏察君無過  
又以他事不直牧然畏其有氣力解牧任並及君又數  
月還牧於州改君理撫建牙釐分局一歲代去而君死  
矣君在江西不數年而歷行間久人多述其戰績余謂  
自咸豐來軍事頻不息湖湘人士急公習鬪雖兒童皆  
有強悍猛烈之風能戰不足爲君重獨其當官行事確  
然於義利之介以名節自厲乃可貴也元配某氏繼娶  
某氏子一人蕃以軍功敘從九品留江西補用 賞藍  
翎女三人適某某孫三人宗蓮宗遊降服宗達君疾  
作命蕃曰吾生不竟其志死懼遂泯滅王先謙吾執友

也宜爲吾銘旣葬蕃遣人持君行狀走京師述遺命以請乃爲銘曰

大難不死宜有長年胡君志之宏遠卒鬱而莫宣退之有言不我者天旣知命而不苟又何恫於九泉

閔浩齋先生墓誌銘

先生姓閔氏諱振瀚字浩齋湖南長沙人其上世籍湖北江夏先生高祖之父黯以進士官至廣東潮州府知府生子又儒慷慨好施與今湖北省城育嬰堂所捐故宅也又儒生光祖始遷長沙光祖生文選文選生啟棠從九職加六品銜先生少以文名然婁困場屋年三十始補縣學生食廩餼咸豐戊午鄉試已魁選矣策第五道謄錄生入以他語主試者不敢錄由是卒不售家世寒素有弟豪放不事生人產先生友愛曲至父怡母悅孤光特起清映閭巷嘗搗門庭隱艱曲悠惟德行醇至

故能人所尤難羣從兄弟貧者分事畜所餘給之老而彌篤與人坦夷和樂而有不可奪之操授徒卅餘年多所成就今大學士侯湘陰左公聞其名延課其子遂參軍幕積勞被薦以訓導用辭歸不復出同治十三年二月二十八日卒於家年五十一娶黃氏生子男四家鈞軍功六品職銜家鎮縣學生家鑑殤家銓女三長適縣學生楊肇元次適甘肅候補知縣張兆熊三早卒孫男三聲烈聲照聲煥孫女三某年月日葬省城南金盆嶺藍家壠先生與先長兄交久先大夫深敬之命次兄及先謙從遊曰余令爾等事閔先生不惟其文乃其至行

可法也。先生門人日益眾。然愛先謙及左孝威特異。孝威左公長子。弱冠舉於鄉。旋卒。鄉人丐大吏請於朝。爲建孝子祠者也。一日同侍先生飲。先生酒酣。顧笑曰。吾百年後先謙當作墓誌。孝威書之。今孝威早逝。而先謙學業薄陋。不足闡揚盛美。家鈞等乃固以請。思先生前言。泣然不敢辭。銘曰。

先生孝行不愧厥祖。孰闕其光。鬱而終古。謂天可信。胡冥冥有子。無爲奪莫爭。維古聖賢。皆後亭歐陽子言爲公銘。

周仲茗墓誌銘

大清光緒元年歲在乙亥六月壬辰周君淪蕃卒於京師越六月先謙歸自江西走哭其位於是吾師自菴先生輟涕而言曰吾子所以奉其親者吾旣爲之辭以寓吾哀若其生平行義宜有述知吾子深莫汝若汝其銘先謙敬受教曰諾迺敘而銘之君字琥生仲茗其自號湖南長沙人 贈光祿大夫諱大霍之曾孫 贈光祿大夫嘉慶戊寅舉人浙江泰順縣知縣諱時翥之孫今內閣學士兼禮部侍郎銜名壽昌號自菴之次子幼而警敏稟其家學靡不通覽不待父兄之教己自爲成人



年十六應長沙府試知府張公修府驚歎其文以爲異才拔冠其曹矣嗣知世家子迺置第二既入縣庠侍父京師舉庚午順天鄉試通永鎮總兵周君得勝請贊其軍事歷保分省候補同知直隸州 賞花翎卒年三十三君始來京師也先生方屈下位深自韜抑喪亡迭轅懷抱堙鬱君承指望氣迎喜塞悲值先生危疾明醫幽神求不閒日得藥餌手烹進夜傍徨庭闔中聞欠伸趨入問少閒則出假寐以俟有頃又至如前抵病愈無倦色先生耆古書畫典質求購賈者盈前君從旁評隲殿最進退無不當先生意侍講論窮日夜隨所導引輒洞

竅要觸類而長更出意表先生每曰吾有此兒而後知爲人父之樂也得官後或以及時出仕勸君曰吾兄以祿養矣吾安可更舍而他適就浮榮輕難得之日耶爲詩文落落自喜恆苦思數日得之覽者驚服乃曰此非我所能惟吾父之教治古文辭業益大進體羸善病未竟其長然意致深遠矣卒後十日葬京師南郭湖廣義園其友李編修郁華曰君明於處事誠於接物持家有法治軍有能惟大原無虧以光其學業如稱曰文孝足以包眾美古士有易名況無忝若君者哉會葬者皆曰然初君娶同邑余氏先君卒無出先謙旣爲之傳矣妾

戴氏生子一衍祐君卒時裁四歲銘曰

昔韓愈氏有言父子閒自爲知己先生文行信於後世聲譽流於當時卒其自以爲知己者莫如其子宜君之死而先生悲之甚不可止也嗚呼仲茗交余以神朝夕過從匪私其姻余行五日而君暴卒天成之艱胡奪之速歸入其室闋無其人往視其藏涕盈我巾修德必報惟古之云伐石鐫辭以詔後昆

誥贈光祿大夫陳君墓誌銘

湖南衡陽陳君者拾金於道有泣而來者曰吾死矣君  
叩所以曰有遺於橐厥數盈百旁求途人卒不可獲吾  
死矣君慰之曰毋然金固在其人大感動剖以謝不受  
請治具焉辭或迂君君笑曰我迂耶懼微之非義重我  
愆耳於是鄉人翕然稱陳君長者長者 國家用仁讓  
風示天下自雍正五年旗民六十一拾金報官得 旨  
旌賞而河東總督田文鏡奏孟津民翟世有夫婦還金  
事 優詔賜帑 予七品章服尤一時曠典嗣後以拾  
金不昧上聞者悉加獎勵所以導休和而厲薄俗用意

至深遠也。歲久例停而懷清好義之風留於人心者無盡如陳君者。夫豈有所希冀效法而然與世或謂三代下人漸澆訛不返醇樸觀此宜爽然矣。君嗜讀書婁躡童試迹跡田畝事親孝終喪盡禮過富人道光丁未衡陽旱饑君遣子糴斗米百里外或以匱告立與之半曰子饑二日矣得此少濟我將有繼也。然其時君資實乏絕亦竟得不困嗚呼君殆古樂善有守君子人哉惜其潛德不揚未能擴而大之爲世用也。君諱世甯字泰文先世諱朝知者官浙江總兵由臨武遷衡陽爲縣人自其考贈朝議大夫諱茂如公以上三世皆不仕君以

同治十年壬申正月二日卒年七十有九葬某原用子  
恩贈光祿大夫妻某邑某氏夫人生男子二代潮例  
貢生大源廣西遷江縣典史今知府銜廣西補用直隸  
州知州粵寇之據金陵也衡陽彭公玉麟從曾文正公  
治水軍擊賊所部衡人爲多大源奉君命從積戰功擢  
顯秩君猶及見之其鄉之父老皆曰陳氏世有積德食  
報爲宜女子二適彭適凌孫男七啟疇啟昫啟峻啟畋  
啟畋啟畋啟疇曾孫二貞瑞貞琨卒後十四年大源在  
江西吳城鎮總理長江船廠以書抵余南昌乞銘余昔  
在水軍與大源同營相知者也乃爲銘曰

是善士陳泰文之幽宮不顯其躬而後之豐我銘用章  
永爲世風

誥贈中憲大夫楊君墓志銘

君諱有發字茂堂姓楊氏其先江甯人始遷祖廷爵以  
明初從征雲南遂家甯州曾祖璽祖壽父文明始占籍  
寶甯爲縣人生子二長春發次卽君也事父母以孝聞  
每侍疾躬承穢污滌浣廁廕兼旬益勤父母諭少休不  
肯退或兄入侍令君就寢俄頃復至堅籲兄番休至相  
咎怨家人環請代亦足不獲也逮親喪哀毀盡禮家貧  
甚兄行商越南息耗斷絕君欲往訪而其地毒霧溼淫  
中人輒死親友咸勸阻君不聽竟往所歷名區通會遠  
至荒壤絕域人迹閉阻箐谿險惡枕雲席水出高入深



或異音殊俗不通。喻。揭。勝。圖。象。證。驗。萬。端。積。二。歲。餘。徒。步。三。千。餘。里。重。憂。襲。疲。危。疾。骨。立。迄。無。所。遇。號。哭。而。歸。見。者。以。謂。君。天。性。篤。至。艱。苦。卓。絕。雖。前。代。傳。記。所。稱。陳。虞。荔。明。黃。璽。輦。無。以。過。也。咸。豐。三。年。六。月。二。十。六。日。卒。距。其。生。乾。隆。六。十。年。正。月。初。四。日。年。五。十。有。九。後。三。年。四。月。十。四。日。葬。縣。南。昔。板。之。新。幹。寨。用。子。恩。贈。中。

憲大夫妻陸氏恭人同邑處士兆祥女相夫以善族里有稱生嘉慶六年九月初十日卒道光三十年十一月初五日年五十明年十二月二十二日葬縣北那央寨子四鳳朝光緒丙子進士以知縣卽用分發江蘇歷任

沈陽銅山上元知縣擢知通州直隸州俊朝早卒其二  
幼殤女三皆適士族孫女二余同治庚午歲典雲南試  
得鳳朝歎奇其文既官吳中數相見鳳朝已用循良顯  
名當世一日泣謂余曰鳳朝生平歷困苦至多若終天  
之恨尤有不可言者昔己酉歲充拔貢生方赴廷試而  
母遽沒不及侍疾可慟一弟卒先吾父五日祕不敢以  
聞父臨沒猶垂諭及弟昏讀事可慟二女兄弟相繼盡  
沒鳳朝又遭逢亂離四娶妻二二納妾生七子皆短折身  
羈一官遠念墳墓無親屬代祭掃可慟三吾父母皆善  
人而不獲享一日之榮養行事多可稱舉生前不及盡

聞知又久不能悉記鳳朝年垂六十不及時求賢者紀述大懼泯沒前人之遺澤負罪責於無窮先生其忍不章以文余心戚鳳朝之言又敬君至德純行不可以無傳也乃爲銘曰

惟孝友天所庇大其門視循吏聲於石發幽契貽後昆克長世

鹽城縣學生陳君墓志銘

光緒十二年丙戌余按試淮安得鹽城廩生陳玉樹獻所爲毛詩異文箋十五卷余旣嘉其能文窮經知古誼又稔知性行孝友志氣激昂自樹立意甚重之旣乃以書來曰玉樹粗解章句非能自力於學也實惟吾父早歲啟其徑涂以道以掖俾勿瞽蒙以有今日吾父行義見府志概而弗詳鹽城瀕海窮僻玉樹兄弟又困於諸生無氣力致當世大人先生之文顯揚其先儻獲賜銘於幽是不朽吾父而惠玉樹兄弟於無窮也余感其意爲序而銘焉序曰君諱蔚林字松巖縣學生性沈默寡

語笑幼時人或謂不慧及就傅讀書善記覽迺復以敏聞遭歲潦饑爲漁樵以養親晨興懷麥餅數枚刺舟出跣足入水寒風剝骨困踣欲絕念親無所得食迫不敢自休向夕魚蝦蘆葦盈載返歡然侍食共飽日以爲常稍暇復讀明年歲稔讀益奮學遂大成見者謂君固窮之節人莫及也君於書無不窺尤深於詩嘗謂毛鄭舊說善矣然詩義廣博宜以吾思通之墨守一師不務明經旨病與牆面等故其爲詩沈潛本經博稽眾論其有不合反復求之古文段借以定其指歸當時高郵王石臞先生暨文簡公父子經學爲海內大師其推明故訓

是。正。文。字。發。漢。以。來。二。千。年。不。聞。之。祕。君。所。居。壤。地。邇。  
接。聞。風。嚮。往。孤。坐。斗。室。做。精。考。索。一。義。之。獲。欣。然。忘。餐。  
以。爲。自。王。氏。外。無。多。讓。也。所。箸。詩。說。若。干。卷。如。釋。思。須。  
與。漕。以。須。爲。須。誤。字。須。是。沫。古。文。沫。漕。皆。衛。地。可。考。實。  
既。種。既。戒。據。陸。氏。釋。文。春。秋。左。氏。傳。種。種。徐。本。作。董。董。  
以。證。種。董。通。用。種。戒。訓。如。左。傳。之。董。戒。景。山。與。京。據。士。  
昏。禮。注。今。文。景。作。憬。知。景。憬。古。通。此。詩。景。當。讀。爲。憬。毛。  
泮。水。傳。憬。遠。行。兒。與。上。升。望。下。降。觀。相。屬。爲。義。毛。訓。大。  
於。文。不。順。其。精。思。絕。詣。多。此。類。君。生。嘉。慶。二。十。年。九。月。  
某。日。卒。同。治。十。二。年。正。月。二。十。三。日。年。五。十。九。明。年。某。

月日葬捍海堰西祖阡曾祖某祖某父某本生父某妻唐氏同邑縣學生金浦女男子三玉冠廩生玉樹玉墀早卒女子一適羊孫男四孫女一君性儉而樂施嘗值寇亂營兵入鄉大索駢繫老弱將馘以邀賞君傾貲賄犒盡脫其俘其出爲嗣父後也或覬其產豐君推所有與羣從昆弟姊妹一無所校曰用田產細故入公門非吾願也吾能耐任之而已因自號曰耐齋銘曰

豐於義而身迺窮遇之塞其學則通君固知其有然兮曰天道其不並隆而可自信於九原者將有賢子孫以亢其宗

誥贈中憲大夫吏部郎中加二級施君墓志銘

君姓施氏諱玉峻字德泉江蘇甘泉人曾祖某祖某父  
繼先公生有至性甫數齡得隱疾祕不言久漸羸瘦固  
詰迺告曰兒慮貽父母憂也暨長居父喪稟禮盡哀嗣  
是布衣飯蔬食終身而養母必求甘旨女弟適人而貧  
推所有以助務得母懽年五十矣愛慕如童時母或不  
懌則奉杖長跽請撻俟解迺起侍母疾衣不解帶其子  
以君老請番代愴然曰吾一息不在母側此身徬徨無  
所依忍自逸乎督課其子一比於義第三子人鏡官京  
師以曹司壅滯請改外君曰官內外唯上命不宜有



所擇汝勉思盡職若夫利鈍則天也如馳驚於名利而與世汲汲者同趨則居官無望其能自立吾無用此不孝子爲也人鏡懷懷受教由是壹意奉公勤習吏事以清慎敏練受知舉於上官君易簣日猶論人鏡兄弟以它日擢官當廉謹自守始終一節馳書京師傳命敦勛云君卒同治十一年八月二十五日距其生嘉慶二年六月十一日年七十六用子 恩贈中憲大夫妻張氏恭人高郵處士璉女和敬慈仁稱於戚鄰其生少君五十三日卒道光二十三年閏七月初十日年四十七君命諸子曰今吾困窮而汝等學業不就汝母目不瞑矣

待有一能自振者迺爲母卜葬越八年人鏡補縣學生始請於君以十一月某日葬縣西朱橋東圩祖塋君卒以其年十二月十八日合葬子六長桂庭次桂雲次人鏡同治乙丑進士吏部主事洵升郎中次人鑑次桂蟾桂秋皆早卒女一適史氏以節旌孫男五鳳章金章縣學生金門金榜光祿寺署正金詔孫女十銘曰君之行感神祇君之言爲世師聲聞於鄉德不施我最其美無溢辭

李爰得生墳志銘

爰得翁獲葬地於黟南五都舊菴實中段瑤山帶其左  
鍾山倚其右前臨大溪是曰武水原於武陵以達浙江  
其地重固阻深孕靈鍾淑精識之所未遭愚士之所不  
究一旦發露自翁則相與聚觀驚歎歸美致福光緒十  
年翁奉高祖父母父母葬其中伯叔父母以下十人東  
西祔餘地貽後人從葬其中之左築墳二爲翁與妻余  
夫人它日葬所取魏風樂土之意刻石墓門曰爰得我  
所無齊侯無死之悲而有張子吾甯之樂古有達士翁  
足當之矣墳旣成以屬子銘翁姓李氏名宗媚字輝亭

晚遂號爰得安徽黟縣人以商成業入貲得官江蘇補  
用道雖邇榮利處己彌約力於種德不私其財行事多  
遠絕可稱誦易曰善不積不足以成名翁身隱闔閭之  
內心超塵壒之表其耆義也甘而赴之也勇年甫六十  
精神強固若四十許人其裨益斯世蓋未可量若取目  
前一二美行以爲章顯崇褒之具是隘翁也吾闕而不  
書以俟百歲後之紀述翁者其生平世系子孫亦不具

茲文云銘曰

天生善人以爲民紀出澤寰區處濟州里施無大小眠  
知所周畢力而止不問其酬苟補斯人百齡猶短我私

我利其死也。晚子昔語翁。翁曰。匪然無窮者。志有盡者。年擾擾一塵蚩氓。何責但力吾爲。而心吾適。子偉翁語。百世之儀人。皆是則世奚不治。天佑滋闕地靈爰顯表。營有辭惟用勸善。

布政使銜雲南按察使倉公墓志銘

公姓倉氏諱景愉字靜則少平其自號世爲河南中牟人曾祖聖潢刑部員外郎浙江處州知府祖思謙光祿寺署正本生曾祖聖裔附貢生兩淮鹽運使祖思震乾隆丁酉拔貢太常寺博士生子兆彬候選知縣出後思謙兆彬子二長景恪道光丁酉拔貢山東濟甯州判次卽公也道光乙未恩科舉人戊戌成進士改翰林院庶吉士散館授編修甲辰充會試同考官湖北正考官丙午京察記名以道府用充順天鄉試同考官授江西遺缺知府補撫州以憂去官服闋奉旨發往湖南

署岳常澧道咸豐壬子粵寇圍長沙新任巡撫張公亮  
甚至常德檄公筦行營支發從入省城署長沙府敘城  
守及審緝瀏陽會匪功 賞花翎加道銜旋實授兼署

鹽法長寶道用失察私鑄大錢解職旋復任戊午開缺  
以道員畱補署衡永郴桂道敘寶慶防勦功加鹽運使  
銜授湖北荆宜施道調岳常澧道辛酉擢按察使敘辦  
理軍需功加布政使銜同治壬戌引疾去職甲戌授雲  
南按察使兩署布政使光緒戊寅開缺回籍先後主大  
梁書院講十六年以庚寅五月二十一日丑時卒年七  
十五公知長沙塔齊布公以都司守北城公與語奇之

言於張公命將三百人復薦於侍郎曾文正公國藩領  
一軍大膊賊湘鄂潯陽爲中興名將冠公實開之賊圍  
急 欽差大臣徐廣縉督師駐湘潭不進公以同鄉故  
請於大吏親往自天心閣縣而下摩賊壘過見廣縉陳  
說百端廣縉竟不前眾壯公有膽公既官湖南久於吏  
事然不民生利病分孽要妙心搏於公澤下於民間里  
婦孺皆知公鉅人長者比莅滇新熄於回貧敝甚公條  
具亟宜張施數事上議督撫罷諸尤不便蘇枯瘠肥功  
效章明然天性剛直恥媮合苟容意所不可弗少假人  
詞色亦重以是不快流俗按察湖南時巡撫毛公鴻賓



公同年友也布政使員缺鴻寶舍公而以岳常禮道憚  
公世臨權其事憚又公夙所推薦者以論事積不合不  
二年代爲巡撫公遂不能安其位滇中大僚同官多崛  
起軍旅公以文學老成參錯其閒度終不得行吾志去  
計逾決名位弗顯識者惜焉然公之去湖南巡撫百計  
求公過差意榷木稅常德有臧私集關吏役嚴鞠不得  
公毫毛罪家素封道光癸卯河決中牟九堡資用蕩然  
公方官京師冬月衣裘典盡覆衾取煖午後始起友朋  
謂其疏懶終不自言貧可謂強毅有守君子矣夫人同  
邑莫氏先公卒妾戴氏張氏子植廕生山東候補同知

莫夫人出爾顓縣學生國子監典簿爾頌俱戴出先卒  
爾楨廩膳生通政司經歷張出女長次適李三適朱四  
五殤孫永恩殤永培孫女一以某年月日葬某原植等  
遺伴走數千里乞銘先謙兄先惠弱冠受公知有國士  
之目府試拔冠曹其沒也公爲流涕先謙年幼無文就  
試時公以兄故特實先謙前列洎先謙官京師與公相  
見距兄沒十七年語次及之猶太息可感也已銘曰

粵有聖史奎章作新有臺有墳於汴之原四目曜靈流  
慶後昆條繁支衍焜耀朱軒光啟我公炳我 聖文程  
材校藝空其良羣被 命浮湘用牖我民文史清譙旁

羅國寶匪軾匪轍歐陽之門噓生慟死公意何敦皇  
路再稅高坐梁園枚鄒撰杖列士振振祝公百齡冠冕  
人倫胡天不淑壞木頽山公施不究四海歎言雪涕摘  
詞以表私恩

誥封資政大夫安徽桐城馬踏石巡檢陸君墓志銘  
君姓陸氏諱枚字建中立甫其自號晚更號修德老人  
世爲浙江山陰人曾祖華芳祖涵遠父閻風縣學生生  
子三君其長也道光八年援例議敘巡檢分發安徽補  
廣德杭村司調桐城馬踏石君自少意氣豁達有康濟  
民物之志苦不得發攄旣補官慨然曰吾職雖卑抑豈  
不足爲政耶馬踏石治樅陽鎮爲縣漕兌運處邑里殷  
賑民好鬪訟君遇就質者反復開譬俾各解釋咸悅聽  
命逾歲獄訟大衰益爲誥姦宄待暴客捍火災諸法令  
衢巷不驚民弛足臥成梁夷塗發粟施藥充書院費新

神祠損奉爲之遭歲大水浮棺蔽江購地掩葬大斂殍者設船拯溺爲堂育嬰職所能舉皆董勸以就督築濱江隄圩工用堅完農疇大驩然君應務固持審不苟興事爲名樅陽口納七縣水輸之江中瀦爲菜湖浸沃廣衍議隄口捍江潮瀕行婁矣君曰夏秋潦漲隄終潰且旣築泥沙不隨水出雍積益高貽無窮患持不可其明識善斷皆此類也咸豐八年李忠武公續實復桐城大府檄權縣事治附賊者宵脅從保全甚眾復巡檢任先後官樅陽三十六年同治八年乞休用子 恩封中議大夫晉資政大夫光緒十年五月三日卒於桐城旅舍

距其生乾隆某年八月十九日年九十夫人周氏王氏姚氏子八旂江蘇上元淳化鎮巡檢以殉難 賜卹顯勳安徽壽州知州煥從九品卒仁勳糧庫大使戾殤炳勳巡檢獻附貢生銑知州旂顯勳仁勳炳勳出後伯叔父女四二適沈一適何一適吳孫六舜昌吏目卒恆修恆敬恆謙恆浦恆莪孫女八卒年十一月二十七日葬縣天樂鄉新橋頭王夫人耐君耆善出天性尤勇於赴義不以疑難沮廢粵寇踞金陵君集團練勇官軍入竟有卒夜至鎮團勇疑爲盜斃之軍大譁君語領隊者曰勇誠誤殺若違律可使大帥聞邪領隊者氣懾去又每

管過軍之不法者數十百人。訂於解不爲動折以理亦  
卒無事後因事去職。避亂山寺。一日賊訶至。拔刀斫佛  
像大呼。索見舊官。君奮身出我舊官也。見奚爲者。賊愕  
然。君從容語諷之。其人竟斂退。眾大歎異。嗟乎。死生呼  
吸之際。它人或震駭不自持。而君坦然無毫髮計慮。豈  
非所謂慷慨明達之君子耶。可銘也已。銘曰。

吏道上失。媮迺積卑。官營私世。奚責有矯。斯拔古罕。覲  
利澤旁。漑藹循績。懷忠履正。姦辟易以氣配。義聖所迪。  
刻文表幽。最厥迹。更百千世。鞏元宅。

江西進賢縣典史張君墓志銘

君諱景熙譜名恩海字學齋晚自號鶴儕善化張氏其先浙江山陰人始遷祖國瑞於國朝康熙間官湖北白湖鎮巡檢遂家湖南曾祖仕烜祖城字雉千富而好禮實大其宗父廷醇母氏王繼母黃子四君其季也少困場屋棄舉業幕游豫章積勞敎官補進賢縣典史在任九年典史秩卑進賢尤瘠薄奉入常不給而君堅忍峻厲有以非道干者必嚴拒之劉王二姓邑大族也以爭山連訟不決聚族械鬥勢洶洶縣令不敢往大吏檄君履勘或以巨金求左袒君曰如此則械鬥成矣立往



勘實置酒延二族耆老開諭利害積數日爲畫定界域  
二姓感服化爭爲讓曰微公惠禍無已時各立君主於  
其家祠生祀焉未幾解官歸家居垂二十年以二十二  
年二月二十五日卒距其生道光某年六月年六十五  
妻戴氏子五廣椿廣柏廣栢廩貢生四川候補縣丞廣  
榆廣榦女一適長沙毛雲孫七育鳳育鵬育鵠育  
鵠育雁育鵠孫女七張氏自雉干公以耄年碩德五世  
同堂子若孫七十餘人自少逮事祖父大吏援 高宗  
純皇帝定例入奏 賜七葉衍祥額時論榮之先謙少  
壻於張猶及再見雉干公於丈人行中最敬君及知府

贈太僕寺卿繩生先生恩準以爲敦厚明達君子人也。雉千公卒繩生先生亦歿於江南軍中二十餘年間張氏老宿名人凋謝殆盡惟君家庭雍和後嗣皆循守禮法鼎鼎樹立自君一本綿衍內外幾三十人福慶之隆雉千公後罕有及者作善降祥非偶然矣以卒年五月三日葬河西七都燕子山八斗衝首巽趾乾廣椿等泣請銘爲摭其行事章著者書之以見如君之志識而屈於卑官爲可惜也銘曰

唐虞惟百用人代天叔季允濫賊民養官養之不飽剝我黎元豺狼塞塗見者心酸藹藹張君惠心仁言濟介

以勇格彼庶頑孰謂一命利民無權敬告有位視此新鑄

贈太子少保江西布政使陳公墓志銘

公諱湜字舫仙姓陳氏先世有諱珩者於明成化間自江西泰和遷湖南湘鄉一都之常樂鄉遂爲其縣人曾祖大田祖德棻俱太學生父開煦貢生候選教諭三世以公貴 贈光祿大夫曾祖母丁祖母左母杜皆一品太夫人公少蘊奇氣以幹略自負既婁困場屋無所發攄咸豐六年曾文正公國藩勦粵寇江西其弟忠襄公國荃帥師往援要公襄理戎務從下安福萬安進圍吉安文正兄弟奔喪返里公代領忠襄軍丁父憂歸蔣果敏公益澧帥師援粵西強公偕屬以新中營攻平樂府

一戰復之賊趨桂林公率四營遏之大灣車埠村焚大壘二悉破其餘壘逐北卅里剗蘇橋賊巢平磯石灣土賊從攻柳州焚奪潯州援賊船於三河口遂克府城病假歸九年賊酋石達開竄湖南圍寶慶號六十萬大府激公會諸將赴援公宣言曰賊盛不啻倍蓰壘相逼將長圍困我今南閉不通更斷東道禍敗立至宜急重兵扼山峽深溝峻垣與城下軍相首尾通饋餉戰且守以待援萬全計也眾不從賊圍合公大小之戰八十餘迭勝負會湖北援軍至夾擊走達開文正圍賊安慶速公往總營務公規地形策冬令湖涸宜先竭樅陽口蓄水

則援賊唯道集賢關便扼擊忠襄從之遂復安慶自是  
獨領一軍會克無爲州運漕鎮東關銅陵開巢縣含山  
雍家鎮裕溪口西梁山諸城隘丁母憂歸再赴營從圍  
金陵建議先併力九洑洲斷賊江北接濟賊酋李秀成  
來援破其數十萬眾城圍合公將西路軍克江東橋印  
子山七寶橋紫金山諸隘金陵破公入自旱西門遇李  
秀成率死黨走出急擊之秀成匿民舍爲官軍投禽先  
是公以功由主簿積保至道員 賞花翎巴圖魯正一  
品封典至是 命以按察使記名同治四年授陝西按  
察使調山西兼辦防務汾晉狎承平官吏宴娛撚寇入

秦公請於巡撫益兵儲饟得 俞旨同僚積忌齟齬甚  
公孤立束手議自砥柱而上增練水軍吉州鄉甯冬冰  
可徑渡宜河壩築礮設險眾尼不行五年撚酋張總愚  
謀渡渭公令水軍泝河入渭焚三河口浮橋上下周防  
自督朝邑民團嚴備渭北賊不得逞秦撫以聞 上嘉  
其奮勉六年賊由渭上游涉淺傍河疾趨乘吉州凍合  
闌入山西事 聞部議奪職忌者續劾 命遣戍仍畱  
任督防時回撚交蹤窺覩未已公分兵防東自守西河  
卒就前議起龍門抵壺口三百里量山口闊狹作城堡  
使寇不得入鳩工於軍取於山裘八千餘丈半歲而

畢河冰復合。公謂諸將曰：「守足恃可戰矣。」出奇掩擊賊，襲創走撚寇平。命赴甘肅，隨征左文襄。公宗棠委總營務，平金積堡。詔復官，統諸軍規河州。當是時，連喪領將軍情，少沮。公與文襄密畫機宜，隱若符契。賊窺運道，一戰破之，乘勝再厲，回勢以蹙。受其酋馬占鰲降，申定約束，責獻馬械，誅尤不馴者數十人，弭耳崩角，罔敢枝柱。梟狼革心，版圖來歸。出眾不意，咸大驚伏。馬桂源、本源兄弟以撒拉教主，據西甯，受職官，持兩端，懾兵威。走巴燕戎格，公請於文襄，簡精銳自番地，閒道蹕數百里，陟降山谷，踐歷冰雪，距城廿里，所賊覺而駭，悉兵迎。



戰公令於眾曰前有強寇後無歸途不破賊無生矣大呼競進三合三勝桂源本源遁公善視其孥迺因占鰲乞降公以計傳致蘭州論如律撫定其徒黨東渡河降循化廳內八工平堡寨千修城建官立約二十條皆敬信奉行關內將清公復假歸光緒九年 命入覲發江南交忠襄委用 奏派總統諸軍兼理海防營務因事被議回籍十二年 命繪像 紫光閣十六年再被命入都仍發江南補江蘇按察使二十年倭事起 詔北上尋率卒五千援遼二十一年正月駐軍大高嶺左之甜水站坎徑乘隘倭來伺攻迭擊之老君堂八會寨

牛嶺九溝峪柳林子多所斬獲時遼瀋諸軍大集皆蓄縮自保唯公婁挫狂寇往返援應沛若有餘眾倚爲固嶺防鞏完陪都弗驚羣議侈張公不有功七月和議成

命西剿甘肅叛回擢江西布政使改駐山海關專辦

湘軍操防事宜以湖南賑捐賞加頭品頂戴二十二

年四月卒於軍距其生道光十一年十二月年六十六

事聞賜卹如例贈太子少保事蹟付史館廕一

子入監讀書原籍及立功省分建祠公長身高顴威重內蓄臨戰陣意氣颯發不測若神怪善審敵情覘形勢遇艱險沈幾默斷應時立赴卒善自全自湘軍名天下

後進多躋高位公聲績出諸老將上任久不進眾每語及公必相詫曰國家有軍旅事非陳某不任天殆畱異日大用地不則胡然始政於晉軍書之暇雜治案牘必有雪理豪勢無奪逮晚治吳專精竭誠積以歲年多可紀述於是競美公豐於吏才不竟其用尤足惜云夫

人氏潘繼娶氏夏妾氏張胡葛子五善二品頂戴安徽候補道仁五品銜訓導潘出翼棟員外郎銜中書科中書翼梁太學生早卒夏出翼爵胡出女適李歐陽黃季字張孫道亨優廩生道恆附生道穆道愈太學生道頤道履道節道復曾孫傳燧二十三年五月善等葬公湘

潭上十七都瓦子坪首申趾寅泣以銘請辭曰

公之績書太常公之政炳刑章公之軍張吾湘公之澤  
滂帝鄉名雖高抑不揚施弗鴻民有望惟明德永馨  
香臧既堅後必昌

二品頂帶江蘇候補道郭君墓誌銘

君諱慶藩元名立壘字孟純子澗其自號湘陰郭氏其世父兵部侍郎嵩燾及父四品京堂崑燾並以德業負重名世系具余所爲墓碑君幼敏異年十五補縣學生食廩餼既屢躋鄉舉援例得通判軍功累保知府分發浙江乞假歸養家居十年以道員改江蘇遭母喪以毀卒光緒二十二年四月二十二日也距其生道光二十四年九月十八日年五十三妻氏馮妾壬子五本源振鏞本常本疆本焱惟振鏞存舉人五品銜內閣中書女四適江王其二殤孫道樞同光閒郭氏門族鼎盛中外

達官多通家世好君負才地滋欲有爲於世然在浙兩  
筦權稅不試守郡道員黎庶昌使日本請於朝以君  
爲參贊官嬰疾未赴在蘇主揚州運河隄工躬親勞苦  
功效章明而君銜艱遂不起矣君之假歸也余以憂里  
居數相見於文事剖析源流開抉閩奧驚精詣微其應  
不窮余曰子才可名著述奚浮慕世榮爲君笑曰吾涉  
獵及之非所注意也嘗上書大學士合肥李公以爲製  
造招商等局僅收外人所得利什一宜勸輪舟做公法  
貿易外洋收利權又言於今大學士仁和王公論鐵軌  
電報郵政礦務四者宜急舉今更二十年或事已肇端

或法猶未立而時局之棘已百倍於君抗論之日然則中國非無人之患也直謀而不用之爲患如君之明識遠慮不一效其能以沒不尤可傷也邪君著有許書轉注說例一卷說文經字攷辨證四卷說文荅問疏證補誼八卷說文經字正誼四卷合校方言四卷莊子集釋二十四卷泊然盦文集二卷梅花書屋詩集六卷澗園贖稿二卷尺牘八卷卒年某月葬長沙大賢都蒲鐘塘山首癸趾丁兼子午振鏞泣請銘孝思勤勤歷久彌篤越歲壬寅乃序而歸之銘曰

其趣也恹厥施其得也匪所期嗚呼郭君胡不壹爾思

而遽止於斯吾爲子悲



誥授朝議大夫湖南常甯縣知縣龍君墓志銘

君諱起濤字做山禹門其自號永新龍氏先世自江西吉水徙縣之蓮塘四世祖況唐大理評事二十一世祖仕安明鴻臚卿後有諱之普者饒於財移居西洲施藥濟貧時以況瑕丘仲負局翁於君爲太高祖曾祖作樑祖朝官 誥贈奉政大夫父光閣旌於 朝余爲之傳所稱龍孝子者也孝子五男君最幼生有至性少長沈默寡言笑孝子邁危疾君私禱於神祈促齡益親算弱冠補縣學生食廩餼有文名困於鄉試家貧志學益堅常攜一裘就讀府城白鷺書院初至典裘爲食試高等

積貲贖裘餘以購書歸度歲復往咸豐丙辰粵寇陷縣城君走避親友家輒觀書或迂笑之君曰吾無書則兩目無所注非自苦也同治癸酉舉於鄉甲戌成進士以知縣卽用分發湖南先後權辰谿芷江桑植補華容調常甯君之任辰谿也縣多奸徒劫質索贖白晝肆行捕獲杖斃餘皆屏息在常甯禽盜魁蔣姓鹽梟鄧姓解散徒黨人謂例得獎盃上陳君曰殺人以徼功吾弗安也華容瀕湖恃隄捍水官歲巡視民輸千金襲爲例君卻之更助以貲工用堅完俗爭淤田利舉克書院育嬰費疏龍開河導積潦涸田數萬畝澧水出桑植境乾隆中

茅巖山崩水壅不流商阻市荒君碎石通道行旅稱便  
勸捐田租千石贍學官庠序訥然蓋君之爲治循事制  
宜高行若性不以競名涵惠彌襟不以弛威所至士服  
其教民安其生芷江耗倉穀甚鉅爭代輸足桑華並建  
生祠禁勿止雖徇俗非典然民情可見矣君故澹榮利  
光緒二十五年己亥入貲爲知府遂不出明年庚子七  
月初七日卒於湖南省城距其生道光十二年壬辰十  
月初三日年六十九越歲辛丑四月二日權厝善化東  
鄉養廉山首癸趾丁妻恭人氏李繼娶氏賀並同邑人  
子四國樾縣學生翰林院待詔國棠中書科中書俱先

卒國楚舉入知縣國柑湖南候補布庫大使女四適段  
藩蕭旭明朱毓鳳一先卒皆賀出孫男承熾承詒承煒  
承煦孫女六君少從伯兄學相友愛兄陷疑獄君傾數  
百金營救得解然其時不名一錢顯仕後族戚孤寒周  
卹罔勑遇平人必諄諄勸誘曰時當末季殃祥雜降求  
可憑者唯行善乎刊崇儉說分詒親友布衣糲食安之  
若素或與言治生蹙眉不荅相質以詩文經史則講論  
忘疲其耆學益出天性所著毛詩補正廿五卷天霞山  
館文存六卷詩存二卷制義文一卷君於崇階厚祿無  
氣力致之而文學頗見知大吏六充鄉試同考官得士

最盛長沙陸承宗桂陽夏壽田兩編修尤著君會試出  
余房一見相得甚歸里以來過從遂密譚文校藝歡然  
移晷知其天懷皓潔表裏洞徹服官三十年於世俗嬖  
婀。輒媚氣習一無孺染詩曰風雨如晦雞鳴不已如君  
者可謂樂道有守君子人矣國楚等固以銘請泫然不  
能辭系以詩曰

昔君遠祖伯高耀漢敦厚周慎新息攸贊君族紹之於  
鑠洪支於唐於明振聲天墀藥肆善人旌門孝子靈源  
載清厥流不滓君毓世德秉義含仁言動植矩文章潤  
身伏而求志獨寐勿告出一以民仕優仍學遠爾高厲

泊。然。無。營。被。服。河。間。絃。歌。武。城。匪。云。近。名。唯。以。效。職。道。  
學。循。良。兩。無。愧。色。繼。緒。必。達。斂。形。孔。安。老。友。逝。矣。曷。制。

沈。澗。